

В СРЕДУ ВТОРЫЯ СЕДМИЦЫ ВЕЧЕРА,

На Господи воззвах поставим стихов 6. И поем стихиры подобны, глас 2-й.

Подобен: Егда от Древа:

Недр не оставь Отеческих, явился еси на земли плотоносец, за благоутробие Христе, страсть же и смерть прием, воскресл еси тридневен: дверем заключенным внутрь вшел еси, яко всемогущ. Темже ребро Твое Божественное радуясь Фома осязав, Господа и Зиждителя Тя прослави.

Гвоздьми пригвоздился еси на Кресте, копием в ребра прободен еси, желчи вкусил еси Христе, смерть претерпел еси, во гробе положен быв яко мертв, яко Бог же сокрушил еси узы адовы, и совоскресил еси яже от века мертвыя. Темже печати не разрушив, Твоим учеником явился еси, Твое Воскресение уверяя.

Пасха настоящий праздник: Пасха тайная: Пасха Божественная: Пасха спасительная: Пасха к бессмертной жизни преводящая нас: Пасха всякую скорбь отъемлющая от среды: Пасха веселую благодать дающая учеником. Темже Фома вопияше: Господь Бог мой еси, пленивый адова царствия.

И Миней, 3. Слава и ныне: глас 4-й.

О преславного чудесе! Неверие веру известную роди: рекл бо Фома: аще не вижу, не иму веры. Осязав же ребра, богословит воплотившагося, Тогожде Сына Божия позна, яко пострадавши плотию: проповеда воскресшаго Бога, и возопи светлым гласом: Господь мой и Бог мой, слава Тебе.

На стиховне, стихира воскресная, глас 1-й.

Страстию Твоею Христе, от страстей свободихомся, и Воскресением Твоим из истления избавихомся: Господи слава Тебе.

Стих: К Тебе возведох очи мои:

Апостольская вселичная цевница, Святым Духом движимая, безстудных бесов требища упразднила есть: и единого Господа проповедавши, языки избави от прелести идольския, и поклонятися научи Троице Единосущней.

Стих: Помилуй нас Господи, помилуй нас:

Мученичен: Всехвальнии мученицы, вас ни земля потаила есть, но небо прият: отверзошася вам райская врата, и внутрь бывше древа животного наслаждаетесь: Христови молитесь, даровати душам нашим мир и велию милость.

Слава, и ныне: глас 4-й.

О преславного чудесе! Огню трава коснувшаяся спасеся: вложив бо Фома во огненную ребра руку Иисуса Христа Бога, не опалися осязанием. Души бо зловерство преложи на благоверие, тепле возопи от глубины душевныя: Владыка Ты мой еси и Бог, из мертвых воскресый, слава Тебе.

Таже, **Н**ыне отпуцаеши:

По Трисвятом, тропарь праздника. Аще ли тропарь святого, рцы его прежде.
Потом:

Слава, и ныне: Тропарь праздника, глас 7-й

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости.

И отпуст.

В ЧЕТВЕРТОК ВТОРЫЯ СЕДМИЦЫ НА УТРЕНИ,

На Бог Господь, тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости. **[Трижды].**

По 1-м стихословии, седален, глас 1-й:

Подобен: Камени запечатану:

На Кресте пригвоздился еси Животе всех, и в мертвых вменился еси, бессмертный Господи: воскресл еси тридневен Спасе, совоздвиг Адама от тления. Сего ради силы небесныя вопияху Тебе жизнедавче: слава Божественной страсти Твоей Христе: слава Воскресению Твоему: слава низхождению Твоему, едине Человеколюбче.

Стих: Во всю землю изыде вешание их:

Премудрии вселенныя ловцы, от Бога приемше милостивное, молитесь и ныне о нас вопиющих: Господи, спаси люди Твоя, и град Твой, и от содержащих лютых свободи апостолми души наша.

Стих: Дивен Бог во святых Своих:

Мученичен:

Подобен: Гроб:

Мученики Христовы молим вси, тии бо о нашем спасении просят, и вси приступим к ним с верою. Сии источают исцелений благодать, сии полки отгоняют демонския, яко хранителие веры.

Слава, и ныне: Богородичен:

Пророцы Тя явственно предвозвестиша Отроковице Матерь Божию, и апостоли божественнии в мире проповедаша, мы веровахом. Темже вси благочестномудренно почитающе воспеваем Тя, и Богородицу господьственно присно именуем.

По 2-м стихословии, седален, глас 1-й:

Подобен: Гроб Твой Спасе:

Видев Моя ребра, не неверуй Ми более, Слово Фоме неверующему вопияше, перстом Мя осяжи, и рукою испытай: и уведев Моих язв знамения, мирови проповеждь живоносное Мое сие еже из гроба Воскресение.

Слава, и ныне, тойже.

Воскресение Христово: псалом 50. Канон праздника, со ирмосы на 8: и Миней на 4. По 3-й песни, седален Миней. Кондак, и ексапостиларий праздника.

Песнь 1.

Ирмос: Поим вси людие, от горкия работы фараони Израиля Изменшему, и во глубине морстей ногами немокрыми Наставльшему, песнь победную: яко прославися.

Днесь весна душам, зане Христос от гроба якоже солнце возсияв тридневный, мрачную бурю отгна греха нашего. Того воспоим, яко прославися.

Царица дней, светоносному дню, дней же царю явственнейши даронося, красит избранныя люди церковныя, непрестанно поя воскресшаго Христа.

Врата смерти Христе, ниже гробныя печати, ниже ключи дверей Тебе противишася: но воскрес предстал еси другом Твоим Владыко, мир даруяй, всяк ум преимущ.

И святого Минея на 4.

Катавасия: Воскресения день, * просветимся, людие: * Пасха, Господня Пасха! * От смерти бо к жизни * и от земли к небеси * Христос Бог нас преведе, * победную поющия.

Песнь 3.

Ирмос: Утверди мене Христе, на недвижимом камени заповедей Твоих, и просвети мя светом лица Твоего: несть бо свят паче Тебе Человеколюбче.

Новыя вместо ветхих, вместо же тленных нетленная, Крестом Твоим Христе совершив нас, во обновлении жизни жительствовати достойно повелел еси.

Во гробе заключен описанною плотию Твоею, неописанный Христе воскресл еси: дверем же заключенным, предстал еси Твоим учеником Всесильне.

Язвы Твоя Христе, яже волею претерпел еси за нас, учеником Твоим сохранив, свидетельство показал еси Твоего славнаго Воскресения.

И святого Минея на 4.

Катавасия: Приидите, пиво прием новое, * не от камене неплодна чудодеемое, * но нетления источник, * из гроба одождивша Христа, * в Немже утверждаемся.

И кондак, и седален святого.

Слава, и ныне: седален празднику, глас 6-й:

Яко посреде учеников Твоих пришел еси Спасе, мир дая им: прииди и к нам и спаси нас.

Песнь 4.

Ирмос: Велия тайна Твоего Христе, смотрения: сию бо свыше провидя, богозрительно Аввакум, изшел еси, вопияше Тебе, во спасение людей Твоих Человеколюбче.

Желчи убо вкуси, древнее вкушение исцеляя, ныне же с сотом меда, просвещение подая Христос праотцу, и Свое сладкое Причастие.

Радуетися испытаетъ: темже Человеколюбче, на сие повелеваеши Фоме, простирая неверующему ребра, мірови уверяя Твое Христе, тридневное Востание.

Богатство почерп от сокровища некрадомаго Божественнаго, Благодетелю, копием прободеннаго Твоего ребра, премудрости и разума наполняет мір близнец.

Твой всеблаженный хвалится язык, о близнче! Первый бо благочестно проповедует Жизнодавца Иисуса, Бога же и Господа, от осязания исполнься благодати.

И святаго Минея на 4.

Катавасия: На Божественной стражи * богоглаголивый Аввакум * да станет с нами и покажет * светносна Ангела, * ясно глаголюща: * днесь спасение миру, * яко воскрес Христос, * яко Всесилен.

Песнь 5.

Ирмос: От нощи утреннюю поем Тя, Христе, Отцу Собезначальна, и Спаса душ наших: мир мірови подаждь, Человеколюбче.

Представ другом скорбящим Спас, пришествием всю отъемлет скорбь, и играти воздвизает Своим Воскресением.

О воистинну похваляемаго Фомы страшнаго начинания! Дерзостно бо осяза ребра, Божественным огнем блистающая.

Неверие Фомино, веры родительное нам показал еси: Ты бо вся премудрости Твоею промышляеши полезно Христе, яко Человеколюбец.

И святаго Минея на 4.

Катавасия: Утренюем утреннюю глубоку * и вместо мира песнь принесем Владыце, * и Христа узрим правды Солнце, * всем жизнь возсияющая.

Песнь 6.

Ирмос: Пророка спас еси от кита Человеколюбче, и мене из глубины предгрешений возведи, молюся.

Фомы не оставил еси Владыко, погружаема глубинное неверия, длани простер на испытание.

Спас наш глаголаше: осязавше мя видите кости и плоть носяща, Аз не пременихся.

Ребра осяза, и веровав позна Фома, не сый в первом входе Твоем, Спасе наш.

И святаго Минея на 4.

Катавасия: Снизшел еси в преисподняя земли * и сокрушил еси верей вечныя, * содержащия связанных, Христе, * и тридневен, яко от кита Иона, * воскресл еси от гроба.

Кондак, глас 8-й:

Любопытною десницею, жизнеподательная Твоя ребра Фома испыта Христе Боже: созаклоченным бо дверем яко вшел еси, с прочими апостолы вопияше Тебе: Господь еси и Бог мой.

Икос: Кто сохрани ученичу длань тогда неопалиму, егда ко огненным ребром приступи Господним? Кто даде ей дерзость, и возможе осязати пламенную кость, всяко неосязимую? Аще бо не бы ребро силу подало брэнней деснице, како можаше осязати, страданьми поколебавшая яже выше, и яже низу? Сия благодать Фома дадеся, еже сия осязати, Христови же вопити: Господь еси и Бог мой.

Песнь 7.

Ирмос: Образу служити мусикийскому согласию созывающу люди, от песней Сионских поюще отчески отроцы Давидовы, мучителево разориша злочестивое веление, и пламень в росу преложиша, песнь воспевающе: превозносимый отцев и наш Боже, благословен еси.

Яко первый есть дней и Господьственный светоносный сий, воньже радоватися достойно новым и божественным людем с трепетом: приносит бо и века образ, яко осмица совершая будущаго, превозносимый отцев и наш Боже, благословен еси.

Един дерзнувый, неверною же верою облагодетельствовавый нас Фома близнец, решит убо мрачное неведение всех концов, верным неверствием, себе же венец плетет яве глаголя: Ты еси Господь, превозносимый отцев и наш Боже, благословен еси.

Не все усумневся Фома о востании Твоем, не низложися: но несумнительное тщапсеша показати сие Христе, всем языком. Отонудуже неверием уверив, всех научи глаголати: Ты еси Господь превозносимый отцев и наш Боже, благословен еси.

Со страхом руку Фома в ребра Твоя живоносная, Христе, вложив, трепетен ощути действо, Спасе, сугубое, двема естествома в Тебе соединяемыми неслиянно, и верою взываше глаголя: Ты еси Господь превозносимый отцев и наш Боже, благословен еси.

И святаго Минея на 4.

Катавасия: Отроки от печи избавивый, * быв Человек, * страждет яко смертен, * и страстию смертное * в нетления облачит благолепие, * Един благословен * отцев Бог и препрославлен.

Песнь 8.

Ирмос: В пламени огненне горящая пещи Сохраншаго дети, и во зраце ангела Снизшедшаго к ним, пойте Господа, и превозносите Его во веки.

Возжелевый Твое радостное видение, прежде не вероваше Фома: сподоблься же того, Бога и Господа Тя нарицаше Владыко, Егоже превозносим во вся веки.

Претерпевшаго Фомино неверие, и показавшаго ребра, и того дланию осызана бывша, пойте Господа, и превозносите Его во веки.

Твое неудобное сокровище, утаенное нам отверзе Фома: богословив бо языком богоносным, пойте Господа, глаголаше, и превозносите Его во вся веки.

И святого Минея на 4.

Катавасия: Сей нареченный и святыи день, * Един суббот Царь и Господь, * праздников праздник * и торжество есть торжеств: * воньже благословим Христа во веки.

И стихословим Честнейшую

Песнь 9.

Ирмос: Тебе светлую свещу, и Матерь Божию, пречудную Славу и высшую всех тварей, песньми величаем.

Твой светлый день и пресветлый Христе, все светлую благодать, воньже красный добротой учеником Твоим предстал еси, в песнях величаем.

Тебе брэнною дланию осызаема в ребра, и не опаливши сию, огнем нечестиваго Божественнаго существа, в песнях величаем.

Тя яко Бога из гроба воскресша Христа, не очима видевше, но сердечною любовию веровавшие, песньми величаем.

И святого Минея на 4.

Катавасия: Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Екзапостилларий, глас 3-й:

Подобен: Небо звездами:

Моих удов рукою твоею испытавый язвы, не неверуй Ми Фома, узвзленному тебе ради, со ученики единомудрствуй, и живущаго проведуй Бога. [Дважды]

Слава: святого, аще есть и ныне:

Днесь весна благоухает, и новая творь ликует. Днесь взимаются ключи дверей, и неверия Фомы друта вопиюща: Господь и Бог мой.

На хвалитех стихиры, на 4, глас 1-й:

Воскресна:

Боголепное Твое снисхождение славяще, поем Тя Христе, родился еси от Девы, и неразлучен был еси от Отца, пострадал еси яко Человек, и волею претерпел еси Крест, воскрес еси от гроба, яко от чертога произшед, да спасеши мир, Господи слава Тебе. [Дважды.]

Петра и Павла, согласно восхвалим, Луку, Матфея, Марка, Иоанна, Андрея, Фому, Варфоломея, Симона Кананита, Иакова, Филиппа: и все собрание учеников достойно да благопохвалим.

Мученичен: Радуйтесь мученицы о Господе, яко подвигом добрым подвизаетесь, сопротивляетесь царем, и мучители победите, огня и меча не убояетесь, зверем дивным снедающим телеса ваша, Христу со ангелы пение возсылающе, яже от небес венцы прияте, просите мир миру даровати, и душам нашим велию милость.

Слава, и ныне: глас 4-й:

О преславного чудесе! Иоанн на перси Слова возлеже, Фома же ребра осязати сподобися. Но ов убо отонуду страшно, богословия глубокое извлече смотрение: ов же сподобися тайноучити нас, представляет показание ясно востания Его, вопия: Господь мой и Бог мой, слава Тебе.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры, глас 2-й:

Подобен: Доме Евфрафов:

Печаль страстей, * и помышлений буря, * далече да отженется, * и тако процветет * весна веры.

Стих: Во всю землю изыде вещание их:

Явился еси Спасе, * священным Твоим апостолом, * дверем заключенным, * теми обновляя нам * Божественный Дух днесь.

Стих: Небеса поведают славу Божию:

Ныне Тя Всецарю, * видевшие не очима, * но сердечною любовию, * Бога веровавшие * песньми величаем.

Слава: святого, аще есть. И ныне, глас 6-й:

По днех осмих востания Твоего, Иисусе Царю, единородный Слово Отчий, явился еси учеником Твоим, заключенным дверем, мир Твой подая. И неверующему ученику знамения показал еси: прииди, и осяжи руке и нозе, и нетленная Моя ребра. Он же веровав, вопияше Тебе: Господь мой и Бог мой, слава Тебе.

Таже, Благо есть исповедатися Господеви

Трисвятое. И по Отче наш:

Тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости.

Таже ектения: Помилуй нас Боже:

Час 1. И отпуст.

НА ЛИТУРГИИ

Блаженна от канона праздника, песнь 7-я.

Яко первый есть дней и Господьственный светоносный сий, воньже радоватися достойно новым и божественным людем с трепетом: приносит бо и века образ, яко осмица совершая будущаго, превозносимый отцев и наш Боже, благословен еси. [Дважды]

Един дерзнувый, неверною же верою облагодетельствовавый нас Фома близнец, решит убо мрачное неведение всех концев, верным неверствием, себе же венец плетет яве глаголя: Ты еси Господь, превозносимый отцев и наш Боже, благословен еси. [Дважды]

Не всуе усумневся Фома о востании Твоем, не низложися: но несумнительное тщашеся показати сие Христе, всем языком. Отонудуже неверием уверив, всех научи глаголати: Ты еси Господь превозносимый отцев и наш Боже, благословен еси. [Дважды]

По входе тропарь праздника: глас 7-й:

Запечатану гробу, Живот от гроба возсиял еси Христе Боже, и дверем заключенным, учеником предстал еси, всех Воскресение: Дух Правый теми обновляя нам, по велицей Твоей милости. [трижды].

И храма Богородицы, и храма святого. Посем настоящего святого, аще есть. Также кондак храма святого. Слава: святого:

И ныне: праздника: Кондак, глас 8-й:

Любопытною десницею, жизнеподательная Твоя ребра Фома испыта Христе Боже: созаключенным бо дверем яко вшел еси, с прочими апостолы вопияше Тебе: Господь еси и Бог мой.

Храма же Христова, и Богородицы кондак, во всю Пятдесятницу не глаголем.

Прокимен Апостола, глас 3-й: Велий Господь наш, и велия крепость Его, * и разума Его несть числа.

Стих: Хвалите Господа яко благ псалом: Богови нашему да усладится хваление.

Апостол Деяний, зачало 12=е [Деян. 4, 23 – 31.]

Во дни оны, отпущена же бывша приидоста апостола ко своим и возвестиста, елика к нима архиерее и старцы реша. Они же слышавше единодушно воздвигоша глас к Богу и рекоша: Владыко, Ты, Боже, сотворивый небо и землю и море и вся, яже в них, Иже Духом Святым усты отца нашего Давида отрока Твоего рекл еси: вскую шаташася языцы, и людие поучишася тщетным? Предсташа царие земстии, и князи собращася вкупе на Господа и на

Христа Его. Сбращася бо воистинну во граде сем на Святаго Отрока Твоего Иисуса, Егоже помазал еси, Ирод же и Понтийский Пилат с языки и людьми Израилевыми, Сотворити, елика рука Твоя и совет Твой преднарече быти: И ныне, Господи, призри на прещения их и даждь рабом Твоим со всяким дерзновением глаголати слово Твое, Внегда руку Твою прострети Ти во изцеления, и знаменiem и чудесем бывати именем Святым Отрока Твоего Иисуса. И помолвившимся им, подвижесе место, идеже бяху собрани, и исполнишася вси Духа Свята и глаголаху слово Божие со дерзновением.

Аллилуиа, глас 8-й: Приидите возрадуемся Господеви, воскликнем Богу Спасителю нашему.

Стих: Яко Бог велий Господь, и Царь велий по всей земли.

Евангелие Иоанна, зачало 16-е [Ин. 5, 24 – 30.]

Рече Господь ко пришедшим к Нему иудеом: аминь, аминь глаголю вам, яко слушаеи словесе Моего и веруеи Пославшему Мя имать живот вечный, и на суд не приидет, но преидет от смерти в живот. Аминь, аминь глаголю вам, яко грядет час, и ныне есть, егда мертвии услышат глас Сына Божия, и услышавше оживут. Якоже бо Отец имать живот в Себе, тако даде и Сынови живот имети в Себе И область даде Ему и суд творити, яко Сын Человечь есть. Не дивитесь сему: яко грядет час, в оньже вси сущии во гробех услышат глас Сына Божия, И изыдут сотворшии благая в воскресение живота, а сотворшии злая в воскресение суда. Не могу Аз о Себе творити ничесоже. Якоже слышу, сужду, и суд Мой праведен есть, яко не ищу воли Моея, но воли пославшаго Мя Отца.

Вместо же Достойно, поем:

Ирмос: Ангел вопияше Благодатней: Чистая Дево радуйся, и паки реку, радуйся: Твой Сын воскресе тридневен от гроба, и мертвыя воздвигнувый: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Причастный: Похвали Иерусалиме Господа, хвали Бога Твоего Сионе.

Аллилуиа, [трижды]